

Ha'u nia respeitu ba Sua Exelénsia Doutór Rui Araújo, Aurélio Ximenes, Embaixadór Abel Guterres, Brigadeiru Jenerál Aluk Descartes, no Kapitaun Pedro Klamar Fuik.

Iha loron-kmanek ida-ne'e, Embaixada Estados Unidos Amérika sei entrega doasaun kuantidade boot materiais desinfetante no limpeza nian ba Sentru Integradu Jestaun Krize hodi distribui ba eskolas, postu saúde no eskritóriu sira.

Enkuantu Estados Unidos Amérika luta batalla difísil hasoru COVID-19 iha ami-nia nasaun, ami mós kontinua apoia Timor-Leste no ami-nia parseiru sira iha mundu tomak hodi prevene propagasaun pandemia ida-ne'e.

Too agora, Estados Unidos Amérika fornese ona finansiamentu liu \$1.6 miliaun ba Timor-Leste iha esforsu ida-ne'e. Ne'e inklui \$1.1 miliaun ne'ebé ami fó ona iha fulan Marsu liubá.

Semana kotuk, ha'u sente orgullu tebes lansa ona projetu kolaborasaun foun ida ho Ministériu Saúde no UNICEF ho kontribuisaun finansiamentu \$500,000 husi USAID. Projetu ne'e sei fornese facilidades bee no saneamentu ba postu saúde lubuk ida iha Timor-Leste.

Semana kotuk, iha Ministériu Edukasaun, ha'u hetan oportunidade hodi entrega doasaun máskaras hena reutilizável hamutuk 15,000 ne'ebé Embaixada sosa husi servisu-nain feto Timoroan sira. Projetu ne'e apoia ita-boot sira-nia esforsus hodi loke fila-fali eskola sira ho seguru.

Ohin, ho kontribuisaun sasán hirak ne'e ne'ebé ho valór \$15,000, ha'u espera katak sei ajuda liután Governu Timor-Leste hamoos eskolas no postu saúde sira atu nune'e sidadaun sira bele fila hikas fali ba.

Materiál hirak ne'e bele uza ba prodús líkidu-limpeza hamutuk litrus 750,000 no sei benefisia estudantes rihun-resin no promove ambiente aprendijazen seguru no saudável. Sasán sira ne'e mós sei ajuda Ministériu Saúde mitiga propagasaun "segunda onda" husi COVID-19 no propagasaun moras hada'et sira seluk.

Ami inklui mós instrusaun ba uza – hakerek iha Tétun – atu nune'e pesoál limpeza sira bele utiliza ho seguru sasán hirak ne'e. Ami aplaude servisu sira ne'ebé halo ona husi pesoál sira iha liña-frente ne'ebé dezempeña papel esensiál hodi mantein ita-hotu seguru.

Militár Estadus Unidus nia Komando Indo-Pasífiku maka fornese finansimentu ba projetu ida-ne'e no ho montante liu \$125,000 iha ámbitu assisténsia COVID-19. Ha'u agradese ami-nia Adidu Defeza Embaixada Estadus Unidus Amérika, Majór Ezérsitu Estadus Unidus Pablo Valerin ba nia esforsus hodi realiza iniciativa ida-ne'e.

Ha'u sauda Povu Timor-Leste nia korajen hodi luta hasoru COVID-19. Maske hamenus ona aspetu balun husi Estadu Emerjénsia, Estadus Unidus Amérika kontinua nafatin komprometidu serbisu hamutuk ho Governu Timor-Leste hodi prevene propagasaun moras ida-ne'e no moras hada'et sira seluk.

Obrigada barak